



*Iesus presche au Temple : vne femme eleue sa voix admirant sa doctrine :
les Iuifs demandent des signes.*

AINSI que Iesus Euangelisoit la doctrine de salut, vne femme qui estoit entre le peuple, esleua sa voix, & luy dist : Bien-heureux est le ventre qui t'a porté, & les mammelles que tu as succées. Adonc il dist, Mais bien-heureux certes sont ceux qui entendent la parole de Dieu, & qui la gardent. Or comme il parloit encore au peuple, voicy sa mere, & ses freres (ou parents) qui estoient dehors, demandans à parler à luy, & enuoyèrent quelqu'un pour l'appeller : ce qui fut annoncé ; mais Iesus répondit : Qui est ma mere, & qui sont mes freres ? Et estendant sa main sur ses Disciples, il dist ; Voicy ma mere, & mes freres : car quiconque fait la volonté de mon Pere qui est es Cieux, est mon frere, ma soeur, & ma mere. Et aucuns des Scribes & Pharisiens interrogerent Iesus, disans : Maistre, nous voulons voir quelque signe de toy ; mais il leur dist, La generation mauuaise, & adulateur, demande signe, & ne leur en sera point donné sinon le signe de Ionas. Car comme Ionas fut trois iours & trois nuits au ventre de la Baleine, ainsi sera le Fils de l'Homme, trois iours & trois nuits dedans la terre.

S. Matthieu Chap. 12. S. Marc Chap. 3. S. Luc Chap. 11.